

# FAI HA LOTU, HILAMANI



Fai 'e Dayle Searle  
(Makatu'unga 'i ha talanoa mo'oni)

Ko e fuofua 'aho 'eni 'o Hilamani 'i he akó. Na'á ne tui hono sote na'á ne sai'ia taha aí, pea na'e 'i ai 'ene penivahevahe fo'ou. Na'e faka'atā ia 'e he'ene faiako fo'ou ke tangutu 'i ha tēpile mo hono ngaahi kaungāme'a ko Silivesitā, Siaosi, mo Maikolo. Ko ha 'aho faka'ofa'ofa ia.

Na'e pehē ange 'a Señora Mātini, "Fakamaau ho nga'oto'otá. Ko e taimi kai 'eni."

Na'e lotu fakataha ma'u pē 'a e fāмили 'o Hilamani kimu'a 'i he ma'u me'atokoní. Na'á ne hiki hake hono nimá. "Señora Mātini, te tau 'uluaki lotu pea toki kai?"

Na'e malimali atu 'a Señora Mātini kia Hilamani. "Te ke lava 'o tāpuaki'i ho'o me'akai kapau te ke loto ki ai."

Na'e fakaava 'e Hilamani mo hono kaungāme'a 'enau kai ho'ataá.

Na'e fehu'i ange 'e Silivesitā, "Ko e hā 'a e lotú?"

Na'e pehē ange 'e Hilamani, "Ko e talanoa ia ki he Tamai Hēvaní. Ko e founa ia 'oku tau fakamālō ai kiate Ia ko 'etau me'akai."

Na'e fehu'i ange 'e Maikolo, "Te ke lava nai 'o lotu ma'atautolu kotoa?"

Na'e kūnima 'a Hilamani. Na'e kūnima foki mo hono kaungāme'a 'e toko tolú. Na'e kuikui 'a Hilamani pea punou hono 'ulú. Na'e fai 'e hono kaungāme'a e me'a tatau.

Na'e fai leva 'e Hilamani e lotú, 'o hangē pē ko hono fai 'e hono fāmilí. Na'á ne fakamālō ki he Tamai Hēvaní



'i he 'aho lelei na'a nau ma'u mo 'enau kai ho'ataá. Na'á ne kole ke tāpuaki'i 'enau me'akai. Na'á ne faka'osi 'aki e huafa 'o Sīsū Kalaisí pea ne pehē, "Ēmeni."

Na'e hanga hake 'a Silivesitā, Siaosi, mo Maikolo.

Na'e pehē ange 'a Hilamani, "Te mou lava foki 'o pehē 'ēmeni."

Na'e mamali hono kaungāme'a mo pehē, "Ēmeni."

'I he kai ho'atā 'o e 'aho hono hokó, na'e pehē 'e Silivesitā, "Fai ha lotu, Hilamani."

Na'e pehē 'e Maikolo, "Io, fai ha lotu, Hilamani." Na'e kamo pē 'a Siaosi.

Ko ia na'e toe lotu 'a Hilamani. 'I he taimi ko 'eni na'á ne fakamālō ai 'i hono ngaohi ange 'e he'ene fa'e'e ha sanuisi hami mo e siisi, 'a hono manakó. Na'á ne kole ki he Tamai Hēvaní ke tokoní'i kinautolu ke nau ako 'i he kalasí he 'aho ko iá.

'I he kai ho'atā 'o e 'aho kotoa pē, na'e pehē ange 'e he kaungāme'a 'o Hilamani, "Fai ha lotu, Hilamani." Pea na'e fai 'e Hilamani ha lotu 'i he 'aho kotoa pē. Na'á ne lotu mo hono kaungāme'a 'i he 'aho takitaha 'i ha uike 'e taha.

'I he taimi kai ho'atā 'o e Mōnite hono hokó, na'e pehē ange 'a Maikolo, "Te u lotu au he 'ahó ni."

Na'e 'ohovale 'a Hilamani. Na'á ne kūnima, kuikui hono matá, punou hono 'ulú, pea fakafanongo lolotonga e lotu 'a Maikoló.

Na'e kamata 'aki 'e Maikolo 'ene pehē, "E Tamai Hēvani." Na'á Ne fakamālō kiate Ia koe'uhí

ko 'enau me'akai pea ne kole ke Ne tāpuaki'i ia. Na'á ne faka'osi 'aki e huafa 'o Sīsū Kalaisí pea ne pehē, "Ēmeni."

Na'e pehē 'a Hilamani mo Siaosi, "Ēmeni!"

Na'e pehē 'a Silivesitā, "Ēmeni. 'Ikai ke u 'ilo 'okú ke lava 'o lotu."

Na'e pehē ange 'e Maikolo, "Na'á ku ako 'i he'eku fanongo kia Hilamani. Na'á ku kole ki he'eku mātu'á ke u tāpuaki'i 'emau me'akai 'i 'apí. Na'á na 'io mai, pea ne u lotu pē 'o hangē ko ia ne fai 'e Hilamani."

Na'e pehē 'e Silivesitā, "Tō atu. 'Oku ou fakakaukau mo au ke kole ki he'eku mātu'á ke u fai 'emau lotu kai."

Na'e pehē ange 'e Siaosi, "Mo au pē!"

Na'e malimali 'a Hilamani. Na'á ne fiefia 'i he'ene lava 'o tokoní'i hono kaungāme'a ke ako ke fakatau-folofola ki he Tamai Hēvaní. Na'á ne 'ilo'i na'e 'ofa 'a e Tamai Hēvaní 'iate ia, pea na'e 'ofa foki 'a e Tamai Hēvaní 'i hono kaungāme'a. ●

Na'e hoko 'a e talanoa ko 'eni 'i Mekisikou.

